

# КАНОН

## пред иконой Пресвятой Богородицы "Спорительница Хлебов"

### Тропарь, глас 3:

О, Пречистая Дево Марие, Мати Царя небесе и земли, благоутробно призираеши на любящих Сына Твоего, Христа Бога нашего, и труждающихся во имя Его вечнаго ради спасения, и подаеши им вся обильно к наслаждению, Спорительнице сущи хлебов им, избавляя их всякия нужды и утеснения и устрояя им, рабом Твоим сущим, избавление вечныя муки и жизнь вечную.

### Канон глас 8.

#### Песнь 1.

*Ирмос:* Воду прошед яко сушу, и египетскаго зла избежав, израильтянин вопияше: Избавителю и Богу нашему поим.

**Припев:** Пресвятая Богородице, спаси нас.

Божиею силою благочестно укрепи мя, радостно славити икону Твою, Пречистая, заступление граду Твоему, и всем людем Твоим державу неразрушиму, Пресвятая, и стаду Твоему утверждение.

Благостыню и милость почерпаем Твоими молитвами: Ты бо Бога Сильнаго родила еси, спасающая вся благоверныя молением Твоим, Пренепорочная. Егоже ради Тя ублажаем вси, Владычице.

**Слава:** Твою святую икону, почитающе, Пречистая Богородице, Тобою спасение нетленно даровася, и неразрушимо веселие и надежда, Покров и держава, и душам нашим Прибежище.

**И ныне:** Под Твой кров притекаем, Владычице, людие Твои, Пренепорочная, Помощница буди нам рабом Твоим, и спасению прошение подающи, любовьию поющым Тя.

### Песнь 3.

*Ирмос:* Небеснаго круга Верхотворче Господи, и Церкви Зиждителю, Ты мене утверди в любви Твоей, желаний краю, верных Утверждение, Едине Человеколюбче.

**Пресвятая Богородице, спаси нас.**

Всечестную Твою икону, Пресвятая Дево Чистая, ангел множество на небесех, и человеческий род на земли блажит: яко Мати бысть Творца всех Христа Бога. Того молящи за ны не престай молим Тя, иже на Тя с Богом упование возложихом, Богородица Препетая и Неискусобрачная.

Освящаеши благочестно, верно притекающих ко храму Твоему, и припадающих любовию к иконе Твоей: избави нас от всяких бед, и победы даруй православным христианом на поганья: и милостива сотвори нам Сына Твоего и Бога нашего.

**Слава:** Девическаго Твоего чрева красен Клас явлься, израстила бо еси миру Жизнь. Сего ради силы небесныя вопиют Тебе Богородице: Радуйся, Благодатная, Господь с Тобою.

**И ныне:** Радостными душами, и в веселии сердца приимше ум к Твоему честному и святому образу, и вси вернии молим Тя, Богородице, яко Пречистому Сыну Твоему млеко подала еси, Иже нас Питавый милостию Своею.

### Седален, глас 4:

Церковь Твоя светло празднует Твоего славнаго образа явление, и вси вернии, поюще, зовем Ти прилежно, Чистая Дево: вся верныя укрепи на вражию силу, и советы беззаконных разори: и живот наш направи, творити Божественную волю Сына Твоего.

Слава и ныне, тойже.

### Песнь 4.

*Ирмос:* Услышах, Господи, смотрения Твоего таинство, разумех дела Твоя, и прославих Твое Божество.

## **Пресвятая Богородице, спаси нас.**

Ты убо, Дево Чистая, к Свету незаходимому пришедши помяни нас, молящи Сына Твоего и Бога нашего, Твою честную икону празднующих, подати грехов оставление.

Якоже солнце светозарное, небо преходяще сияет, и Твой Божественный Лик лучы испускает: страстей же мглу от нас отгоняя, дарует душам нашим очищение, и от бед освобождение.

**Слава:** Ныне мрак злобный потребися, и солнечный и душевный свет возсия, Всенепорочная Божия Матере, праздник честного образа еяже благочестно празднуем.

**И ныне:** Прибежище великое и похвала, Пречистая и Пренепорочная Мати Всепетая: Ты Кивот умных Святыни, Ты целоб Источник неисчерпаемый, чтущих Тя покрывай от всякого зла.

## **Песнь 5.**

**Ирмос:** Вскую мя отринул еси от лица Твоего, Свете Незаходимый, и покрыла мя есть чуждая тьма окаяннаго? Но обрати мя и к свету заповедей Твоих пути моя направи, молюся.

## **Пресвятая Богородице, спаси нас.**

Исполняется святыни всяческая, к Тебе прибегающим: и прощение вернии приемлюще, празднуем Твою святую икону, и молим Тя, Пречистая, подати нам благодать и милость в день судный.

Вельми добротою украси Тя Бог, яко в человецех Свет на руку Твоею: Яже едина во Свете Его, Упование христианом, Помощница сущим в нуждах и скорбех, и Пританище в пучине труждающимся: моли избавитися от напастей, любовию чтущия икону Твою.

**Слава:** Яко другой рай всем познавается, стяжавый посреде благоухания цвет, Твой честный праздник, Божиим благоуханием верных сердца исполняет, иже любовию чтущих Тя, Пренепорочная Владычице.

**И ныне:** Облак была еси, Дево, дождю Божию, Пренепорочная Владычице, воду спасительную испускаючи, землю грехми изсохшую

напоивши, приводящи плод творению добродетели: сего ради уболажаем Тя.

## **Песнь 6.**

**Ирмос:** Очисти мя Спасе, многа бо беззакония моя, и из глубины зол возведи молюся: к Тебе бо возопих, и услыши мя, Боже спасения моего.

### **Пресвятая Богородице, спаси нас.**

Прежде всех век Сущаго. Яко Отроча родила еси, и наша сердца обновила еси, многими грехи обетшавшая: и обновление приими нашего пения, приносяще Твоему празднику, Богородице Приснодево.

Дева Мария Богородица воистинну, яко облак светлый нам возсия. Ктому Адам не осуждается, и Ева от уз свободися. Сего ради и мы зовем, вопюще с дерзновением Единой Чистой: Пресвятая Дево, моли Сына Твоего, подати грехов оставление.

**Слава:** Душа всяка веселится, сошедшеся в церковь Твою, и пред иконой Твоей взывающе, Дево Богородице: всех и нас озари, и просвети сердца наша, Дево Мати Владычице.

**И ныне:** Днесь небесная врата отверзаются, и дверь Божественная предгрядет. Днесь радости благодать начинается, являюще миру икону Божия Матере, к нейже вси вернии возопиим: Радуйся, Благодатная, Господь с Тобою.

### **Кондак, глас 6:**

Предстательство христиан непостыдное, ходатайство ко Творцу непреложное, не презри грешных молений гласы, но предвари, яко Благая, на помощь нас, верно зовущих Ти; ускори на молитву и потщися на умоление, предстательствующи присно, Богородице, чтущих Тя.

### **Икос:**

К Богородице вопием любовию:

Радуйся, Граде Господень.

Радуйся, скиптре Давидов.

Радуйся, Палато одушевленная.

Радуйся, ручко Божественных манн.

Радуйся, неопалимая Купино.

Радуйся, свещнице златый.

Радуйся, свеще неугасимая.

Радуйся, горо Божия приосененная.

Радуйся, огненосный Престоле.

Радуйся, лестнице и дверь небесная.

Радуйся, жезле Ааронов невлажно прозябый.

Радуйся, всех спасающи от всяких бед и скорбей, и моли, Пречистая, Сына Твоего, получи ти нам милость в день судный.

### **Песнь 7.**

Ирмос: Божия снисхождения огонь устыдися в Вавилоне иногда, сего ради отроцы в печи радованною ногою, яко в цветнице ликующе, пояху: благословен еси, Боже отец наших.

### **Пресвятая Богородице, спаси нас.**

Царица всех пришедши, небесный кров на славу нам устави, притекающих к иконе Твоей святей, еуже спасаемся от невидимых враг нахождения, к Сыну Твоему вопиюще: благословен Бог отец наших.

Рождеством Твоим, Госпоже Богородице Дево, и всеми Твоими праздники, круг лета венчася: и ныне украси день честных Твоя иконы, благодать источающи, мы же вси вернии во храм Твой притекающе.

**Слава:** Вся силы небесныя восхваляют Рождшую Господа, и роди человечестии прославляют Ю и радостно взывают: О, Прибежище наша, Надежда и Покров, и ограждение от вражиих нахождений.

**И ныне:** Благодатный облаче, окропи нас свыше рососою Благодати и милости Твоея, чтущих день праздника Твоея святых иконы, еже почитает, поет и славит всяка душа радуующися: благословена Ты в женах, и благословен плод чрева Твоего.

### **Песнь 8.**

**Ирмос:** Безначальнаго Царя славы, Егоже трепещут небесныя силы, пойте священницы, людие, превозносите во вся веки.

**Пресвятая Богородице, спаси нас.**

Царица еси всех едина Богу, Богородительнице Чистая, святыи Престол и палата Христа Бога: Егоже моли о чтущих Твою честную икону, подати грехов оставление.

Руками святыми истинно понесла еси, в Тебе воплотившагося Господа, на земли, Преславная: и ныне возшла еси превыше небес, и оставльши человеком пресветлый образ Твой, моли Сына Твоего и Бога нашего подати нам оставление грехов.

**Слава:** Божественнии играйте пророцы, чтуще Девы Богородицы икону: Та бо исполни всех речения, вами сказуемаго рождши Христа всех Царя: Егоже превозносим во веки.

**И ныне:** Падшым востание, унывающим радование, заблудшым Наставнице, болящим посещение и исцеление и всем христианом Спасение: соблюди нас, Госпоже, вопиющих и чтущих икону Твою, и избави нас от всяких бед.

### **Песнь 9.**

**Ирмос:** Устрашися всяк слух неизреченна Божия снизхождения, яко Вышний волею сниде даже и до плоти, от Девическаго чрева бысть Человек: темже Пречистую Богородицу вернии величаем.

**Пресвятая Богородице, спаси нас.**

Преславная глаголашеся о Тебе, Граде Божий, и присно Царствующаго небесными и земными, от Тебе Рождшагося, и от земли Тя на Небо Возведша: Емуже непрестанно молися о чтущих преславного Лица Твоего изображение, с нимже Тя величаем.

Безплотных чинове, патриарх собор, и апостолов Божественный состав, пророческий лик, и мученичестии полцы, святителей и преподобных отец лики, и вси святии, веселитесь с нами, празднующе Божия Матере честную икону, и величающе.

**Слава:** Всяческая осватила еси Рождеством Твоим, Пречистая Дево, и явила еси большее просвещение, пречестный день Образа Твоего: егоже празднующе, Тебе величаем.

**И ныне:** Вознеси рог православных христиан, и низложи иноплеменных шатания, Богородительнице Пречистая: невоеваны соблюди грады Твоя, и вся страны христианския сохрани, в нихже великое Твое имя и многославное величается, и верно славится от всех, Владычице Чистая.

### **Светилен, глас 8**

Богородицу Марию вси воспоем: Радуйся, Мати Божия. Радуйся, лестнице одушевленная и разумная. Радуйся, купино неопалимая. Радуйся, стамно Всесвятая. Радуйся, цвете веры. Радуйся, жезле прозябший. Радуйся, золотая кадильнице. Радуйся, горо Божия присенная Дево. Радуйся, разрешение первыя Евы. Радуйся, Престоле Божий. Радуйся, Благодатная, Господь с Тобою, подаждь и нам, недостойным, росу благодати Твоя и яви милосердие Твое